

Мағфират ҳақида мухтасар рисола (танловга)

17:07 / 19.04.2017 3604

“Яхшиликка далолат қилувчи уни қилувчи кабидир”.

Ҳадисдан

Бисмиллаҳир Роҳманир Роҳийм

Улуғ марҳамат ва мағфират соҳиби бўлган, Ўзидан бошқа гуноҳларни мағфират қилувчи зот бўлмаган Аллоҳ таолога беҳисоб ҳамду-санолар бўлсин!

Умматларига тавба ва истиғфор сабоғини таълим берган суюкли Пайғамбаримизга чексиз салом ва саловотлар бўлсин!

Барча нарсада бизларга Набий соллаллоҳу алайҳи васалламга иқтидо қилишни таълим берган саҳобаи киромларга Аллоҳнинг розилиги бўлсин!

Салафи-солиҳийнларга шараф билан эргашиб, Қуръон ва Суннат таълимотларига амал қилишда барчага ўрнак бўлган уламо ва машойихларимизга Аллоҳнинг раҳмати бўлсин!

Қуръон ва Суннат таълимотларини мусулмонларга етказишда шараф билан хизмат қилаётган уламоларимизни Аллоҳ таоло саломат қилсин!

Азиз диндош биродарим! Сарлавҳадан билиниб турибдики, биз барчамиз учун зарур ва фойдали бир мавзуда сўз юритишни ният қилдик. Бу шундай мавзуки, барчамиз унга муҳтожмиз. Ҳамма ҳам хато ва гуноҳдан ҳоли эмас. Гуноҳлари кечирилиб, Аллоҳ таолонинг мағфиратига сазовор бўлишни истамайдиган мўмин бўлмаса керак.

Мўмин банда ҳаётлик чоғида билиб-билмай, яширин ва ошкора ёки мажбурликдан бирор хато ёҳуд гуноҳни қилиб қўяди. Сўнгра, хатосини тан олиб, Аллоҳдан кечирим сўрайди. Гуноҳлари номаи аъмолидан ўчирилишини, ўзи эса қилиб қўйган хатосининг дунё ва охиратдаги уқубатидан халос бўлишни истайди.

Муқаддас Ислом динида шундай ибодат турлари борки, уни сидқидилдан, ихлос билан адо қилган банданинг гуноҳлари кечирилиб, улкан ажр-савобларга мушарраф бўлади.

Уламоларимизнинг шундай таҳсинга сазовор хизматлари борки, динимиз таълимотларини тартибга солиб, китобларда тарқоқ ҳолда келган масалаларни жамлаб, алоҳида китобларга йиғишган. Муҳаддис, мужтаҳид ва машойхларимиз ана шундай шарафли хизматни аъло даражада уддалашган.

Биз ҳам ўтмиш уламоларга эргашиб, устозлардан таълим олган илм ва тажрибаларимизни сарф қилиб, динимиз тарғиб қилган, уларни ихлос билан бажарган мўминнинг гуноҳлари кечирилиб, Аллоҳ таолонинг мағфиратини жалб қиладиган ибодат ва амалларни бир мавзу остига жамлашни ният қилдик.

Қуръон оятлари, ҳадиси шариф ва уламоларимиздан ривоят қилинган асарларни келтириб ўтиб, ўқувчига осон ва тушунарли бўлиши учун ёзилажак сатрларни мухтасар қилдик. Яхши ният билан унга “Мағфират ҳақида мухтасар рисола” дея ном бердик.

Қуйида ёзилажак сатрларда ўзингиз ва динингиз учун фойдали илмни топсангиз, буни Аллоҳнинг тавфиқ ва марҳаматидан, деб билгайсиз. Хато ва камчиликларини эса биз ожиз бандадан, деб билиб, хато ва камчиликларимиз афвини сўраб, хайрли дуо қилгайсиз, деган умидимиз бор.